

- AYITI NI DWA -

*Pep ayisien-yo ka prèdié toujou
Pep ayisien-yo ka prè dié kan menm
Menm aprè laté déchiré,
Menm aprè siel-la eksplozé
Pep ayisien-yo ka prè dié pli fò*

*Yo ka prè dié pou tjenbé, pou oublié
Sé tou sa ki rété yo lè moun-yo anba masonn.
Lè an manman, an ti moun pa ka réponn
Lè an frè, an sè disparet, sé la yo ka rilévé...*

*Pep ayisien-yo ka prèdié toujou
Pep ayisien-yo ka prè dié kan menm
Menm aprè laté soukwé yo,
Menm aprè siklonn nenyen yo
Pep ayisien-yo ka prè dié pli fò*

*Lapriyè-yo, sé djérisson, sé kouraj
Sé pou trouvé an lanvi, pou kontinué ekzisté.
Yo ni pou rasanblé, pou matjé an nouvo paj,
Linité pou rilévé, dan fièté é dan respé.*

*Ayiti sété senbol tout neg,
Ayiti sété lespwa tout neg
An moun nwè ka goumen pou libètéy
Sé pa piès mové sò ki mètéy la i yé jòdi...
Ayiti pa pou dan lanmizè,
Ayiti ni dwa konnet bonnè.
Ni dé péyi ki pou gadéy dan zié,
É fè sa ki fo pou tiréy la yo menm mètéy an jou.*

*Ayiti sété lespwa tout neg,
Ayiti sété senbol pou neg.
Wi... Sé Tousaint-Louverture, sé Dessalines...
I tan pou i matjé plas-li adan limanité !*

*Ayiti pa pou dan lanmizè,
Ayiti ni dwa konnet bonnè.
Pandan i ka prédié pou grandè lavi,
Apré Bondié, nonm osi pé longanné soufrans-li.*

*Ayiti pa pou dan lanmizè,
Ayiti ni dwa konnet bonnè.*

*Anba siel Bondié-a,
Ayiti ni dwa lavi osi
Asou Latè Bondié-a,
Ayisien pou ni bonnè osi*